

Etxenike omendu du Korrika 11k

Zientzia arloa euskalduntzeko ahalegina eta egin duen bidea eskertu nahi izan diote

Amagoia Mujika / Donostia

Omenaldi xumea egin zioten atzo AEK-ko kideek Pedro Miguel Etxenike zientzialariari. Miramonen zientziaren museoa izango denaren atarian ezarri diote Korrikaren lekukoa buruan duen harria. Harri horretan dago Etxenikeri egindako eskertuz hitz grabatuen plaka. Zientzia euskalduntzeko ahalegina eskertu zioten han bildutako guztiek.

DONOSTIAKO Miramon auzoko Parke Teknologikoan datorren urterako zientziaren museoa izango dena abian jarri nahi du Kutzak. Eraikuntza horren aurrean AEK-k Etxenikeri Korrikaren lekukoa ezarri dio, zientzia euskalduntzen egin duen ibilbidea eskertzeko.

Atzo hantxe bildu ziren Pedro Miguel Etxenikerekin batera bide horretan aritu diren hainbat eta hainbat zientzialari, eta horiek guztiek jaso zuten esker ona antolatzaileen eskutik.

Xabier Alkorta Kutzako zuzendari nagusiak hartu zuen lehen hitza: «Egun aproposa eta leku aproposa da hau gaur hemen ospatzen ari garen jaia egiteko. Hemendik urtebetera zientziarekin eta euskararekin hartu dugun konpromisoa hementxe zientziaren museoa ahalbidetuko baita». Gaineratu zuenez, «zientzia eta euskara ezkontzeko konpromisoa» dute, eta ezkontza horren eredu da Etxenikeren lana.

Bestalde, Xabier Irazustak, Korrika 11ko arduradunak, hitz egin zuen. Kutzari esker ona eman zion, leku hori eskaintzeagatik Korrikak Etxenikeri egin nahi izan dion errekonozimendu plaka ezartzeko. Euskararen normalizazioa izan zuen ahotan, eta testu bat irakurri zuen. Testuan azpimarratzen zuen esparru guztietan aritzeak ekarriko duela hizkuntzaren normalizazioa.

Testua irakurri ondoren, harriaren buruan ezarritako lekukoan sartu zuten testua Irazustak eta Etxenikek, han iraun dezaten konpromiso hitz horiek.



Pedro Miguel Etxenike, euskararen gaineko testua lekukoan sartzeko, hantxe iraun dezan etorkizunean. Alboan, Xabier Alkorta Kutzako zuzendari nagusia eta Xabier Irazusta Korrika 11ko arduraduna.



Pedro Miguel Etxenike, Korrikak zientziari eskaini dion kilometroan.

Zientzia euskaraz uztartzea, ezinbestekoa

Ondoren, atzoko protagonistak hartu zuen hitza, Pedro Miguel Etxenikek. Etorkizunaren gainean jardun zuen, Kutzari eta Korrikari esker onak eman ondoren: «Gure herriaren etorkizuna zientzian eta teknologian oinarrituko da ezinbestean, ia mundu osokoa bezala. Horretarako ezinbestekoa da zientzia

euskaraz uztartzea orain eta aurrerantzean».

Gaineratu zuenez, «euskarak ez du aurrera egingo legeek hau edo hori esaten dutelako soilik. Euskal Herriak iraun dezan herriaren nahia, euskaldun izateko nahia da derrigorrezkoa».

Euskara zientzia eta teknologia guztien oinarrian egongo den herria eraikitzeko nahia eta beharra azaldu zuen, eta haxe gaineratu: «Ez dugu edozein motatako

herria nahi, Euskal Herria baizik».

Ondoren, Mitxelenak esandakoak ekarri zituen gogora. Mitxelenak Etxenikeri esan zionez, nahi bakkarra zuen: «Euskadi osoa Euskal Herria bihurtua ikustea, euskaldundua».

Azkenik, eskerrak eman zizkien Korrikan eta beste hainbat lekutan lanean ari diren guztiei, «herri euskaldundua lortzeko bidea egi-ten» ari direlako.

txostena

Zientziaren lekukoak barruan gordeko du euskarari buruzko txostena

Atzo Pedro Miguel Etxenikeri egindako omenaldian etorkizunean gordeko den plaka opa zioten AEK-ko kideek. Plakaren gainean Korrikaren lekuko bat ezarri dute, eta barruan hantxe iraungo duen testua sartu zuten, Xabier Irazustak irakurri ondoren. Honela dio lekukoaren barruan etorkizunean iraungo duen mezuak:

HIZKUNTZA bat erabat normalizatzeko edozein mailatan egin behar da euskaraz.

Askok jarri izan dute zalantzan euskararen balioa, zientzietarako balio ez duen hizkuntza dela esanaz. Baina, zorionez, Euskal Herrian beste asko izan dira euskara, beste hizkuntzen parean, hizkuntza osoa dela demostratzeko konpromisoa hartu dutenak, eta zientzia euskarari arrotz izan ez dakion hamaika lan egin dutenak.

Harri hau jartzen ari garenean, zientziaren museoa proiektua da, ez ordea zientzian euskaraz aritzea.

Gaurko ekitaldi honekin lehena, oraina eta geroa lotzen dira, eta hiru garaiak euskararen bidez lotzeko konpromisoa dugu: zientzia euskalduntzeko eginiko lana ezagutzearekin batera oinarri sendoak jarri dira biharko proiektuak ere euskaldunak izan daitezkeen.

Beraz, hengo harri honek sinboliza ditzala orain arte egindako lanak eta izan dadila gerorako proiektuak euskaldunak izango diren konpromisoa.